

ad retinendum subjectorum favorem , quem hactenus egregium habuistis, Vos ipsi cogitate. Perpendite etiam Dei iram, quam Vos, si talem persecutionem vel approbetis, vel juvetis, Vobis cumulatis. Conscientia certè omnes eos convincit, qui Deum timentes, sacras literas nostramque religionem pernoverunt , nos nullum dogma, quod ex sacris literis desumptum non sit, habere, vel profiteri. Mementote, Vobis ante paucos annos divinitùs concionatorem constitutum *Franciscum Spiram*, qui quàm horribiliter vociferatus sit Patavii, & alibi, *se in aeternum damnatum, propter illam nefariam abnegationem puræ CHRISTI veritatis, quam Citadella in patria fecerat:* ac quàm pertinaciter desperaverit, nemo fermè non novit. Nolite, quæso, putare, humanum aut fortuitum quiddam fuisse, tam horribilem desperationem. Non fuit humanum, Judam, post proditum mundi salvatorem, præ nimio terrore ac desperatione laqueo semetipsum suspendisse, sed ingenti ac ineffabili Dei ira eò compulsus fuit: tametsi Deus eum simul tam tristi exemplo, Pilato, Scribis, Pontificibus ac omnibus Judæis pœnitentiam prædicare voluit. Atqui Spira non minus horribiliter, si non etiam magis, quàm Judas ipse, desperavit: utpote qui tam diu tam horrendè sit vociferatus, neq; voluerit ulli consolationi locum dare, cùm plurimi eum sedulò consolarentur, & sine intermissione semetipsum interficere conatus sit. Omnes optarem, sicut dives ille ad Abrahamum Patrem vociferatur, aliquem ex inferno ad nos redire, nobisque indicare, quæ illic rerum ratio sit, ac propter quæ facta homines benè aut malè in altera vita habeant. Atqui Spiram viventem in inferni cruciatibus existere, omnibusque horribiliter concionari & vociferari, se propter abnegationem ac damnationem agniti Evangelii JESU CHRISTI ad æternum supplicium cum Diabolis adjudicatum, plurimi, præsertim Patavii, coràm audiverunt & viderunt. Nolite putare, illam tantam Dei iram tantùm ad ipsum pertinere: sicut Judæi dicebant ad Judam vociferantem, se justum sanguinem prodidisse, **TU VIDERIS**, Credite mihi, & ad Vos pertinet, qui fertis in vestris ditionibus, ubi Christo portas aperire debuissetis, fidos subditos vestros, metu mortis & crudelium suppliciorum ad tam tetram ac impiam dam-